



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.28/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Kujtim Pasuli kryesues, Hajriz Hoti dhe Bujar Muzaqi anëtarë, duke vendosur përkritazi me ankesën e subjektit politik Lëvizja Vetëvendosje (LVV), me seli në Prishtinë, paraqitur kundër subjektit politik Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, në seancën e panelit të mbajtur më datë 15.01.2025, merr këtë:

V E N D I M

- I. Pranohet e bazuar ankesa e subjektit politik Lëvizja Vetëvendosje (LVV), me seli në Prishtinë, Anr.28/2025 e datës 13.01.2025
- II. Subjektit politik Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënimi më gjorbë në lartësi prej 20,000.00 (njëzetmijë) euro.
- III. Detyrohet Subjekti Lidhja Demokratike e Kosovës (LDK), me seli në Prishtinë, që gjorbën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

A r s y e t i m

Me datë 13.01.2025, PZAP-i, ka pranuar një ankesë nga subjekti politik Lëvizja Vetëvendosje, (LVV), me të cilën pretendon se kandidatja për deputete nga radhët e subjektit politik Lidhja Demokratike e Kosovës, (LDK) Xheneta Syka, me anë të një shpërndarje të videos, ka krahasuar Kryeministrin Albin Kurti me njërin nga figurat më të urryera të historisë atë të Adolf Hitler, gjatë udhëheqjes të së cilit janë vrarë mbi 6 milionë njerëz të pafajshëm.

Sipas parashtruesit të ankesës me këtë veprim kandidatja Xheneta Syka ka cenuar rëndë nenin 34. pika 1.11 të Ligjit për Zgjedhjet e Përgjithshme të Kosovës i cili shprehimisht thotë “përdorimi i gjuhës në formën e shkruar ose gojore, qe nxit ose provokon, ose që mund të nxis ose provokojë, një person tjetër për të kryer një akt të dhunës kundër personave tjerë ose pasurisë, ose e cila nxit apo mund të nxis urrejtje kundrejt të tjerëve, ose duke publikuar ose

përdorur fotografi, simbole ose çfarëdo lloj materiali tjetër që ka ose mund të ketë ndikim të tillë”

Me këtë parashtruesi i ankesës pretendon se kandidatja për deputete nga radhët e LDK-së Xheneta Syka, ka cenuar rëndë nenin 34 pika 1, të Ligjit për Zgjedhjet e Përgjithshme, duke përdorur gjuhë të urrejtjes kundër kryetarit të Lëvizjes Vetëvendosje, njuhërit Kryeministër i Republikës së Kosovës, z.Albin Kurti.

Si dëshmi për pretendimet e tij, paraqitësi i ankesë, ka bashkangjitur si provë një fotografitë dhe video me linkun <https://www.facebook.com/watch/?v=476104568865360> në cilësi të provës materiale.

Më datë 13.01.2025, PZAP-i, e njoftoi subjektin politik Lidhja Demokratike e Kosovës (LDK) për ankesën e paraqitur kundër tyre, duke i dërguar kërkesë për përgjigje deri me 14.01.2025 në ora 12:00.

Në përgjigje në ankesë të paraqitur me datë 14.01.2025, subjekti politik Lidhja Demokratike e Kosovës (LDK) ka kundërshtuar ankesën e paraqitur nga subjekti politik Lëvizja Vetëvendosje i cili pretendon se kandidatja për deputete nga subjekti politik Lidhja Demokratike e Kosovës, znj.Xheneta Syka, ka shkelur nenin 34 paragrafi 1, nën paragrafi 1.11 të LZP-së, nuk qëndron ngase origjina apo burimi i një fotoje të bashkangjitur në ankesën e subjektit politik LVV, është e përpunuar dhe postuar nga krejt dikush tjetër (konkretisht një person me emrin Elena Uka) dhe jo nga kandidatja për deputete nga radhët e LDK-së, dhe se është një gabim në pretendim e që praktikisht i bie që nuk ka as shkelje të LZP-së dhe nenit të pretenduar e kesisoj sigurisht se nuk mund të ketë as mase sanksionuese.

Poashtu në përgjigje në ankesë theksohet se në faqen zyrtare të kandidatës për deputete nga LDK znj.Xheneta Syka nuk ekziston një foto e tillë, sepse ajo është e përpunuar dhe postuar nga një person krejt tjetër, çka vërehet edhe nga postimet e saj në faqen zyrtare të rrjetit social facebook dhe të cilat i keni të bashkangjitura në përgjigje.

Paneli, pasi që shqyrtoj të gjitha shkresat e lëndës në kuptim të nenit 117 par. 3 të LZP-së, konstatoi se:

Ankesa është e bazuar

Paneli, pas shikimit të bërë fotografisë së ofruar si provë materiale e cila është publikuar në rrjetin social të mbështetëses se subjektit politik Lidhja Demokratike e Kosovës kandidatës për deputete Xheneta Syka nga radhët e Lidhjes Demokratike të Kosovës, LDK, dhe me pas e njëjta fotografi është fshirë nga rrjeti social i kandidatës për deputete Xheneta Syka por e njëjta foto nga hulumtimet e Panelit është gjendur se ekziston në portalin Peja në Fokus me linkun <https://www.instagram.com/reel/DEvfN-LtztU/?igsh=MTB1ZnZ2NËNzbGpieA==> , prej nga rrjedh se mbështetësja e subjektit politik Lidhja Demokratike e Kosovës LDK, me qëllim të etiketimit të subjektit politik Lëvizja Vetëvendosje dhe promovimit të subjektit politik Lidhja Demokratike e Kosovës, ka nxitur urrejtje ndaj subjektit politik LVV, në atë mënyrë që përmes rrjetit social ka publikuar, përkatësisht shpërndarjen në faqen e saj të rrjetit social video ku në këtë video, është bërë krahasimi i personalitetit të kryetarit të subjektit politik Lëvizja Vetëvendosje me figurën e Adolf Hitlerit.

Paneli, konform nenit 13 par. 6 të Rregullave dhe Procedurave të PZAP-it, Nr. 01/2014, me datë 14.01.2025, ndërmori hetim lidhur me pretendimet e paraqitësit të ankesës dhe gjeti se të njëjtat janë të bazuara.

Përdorimi i një gjuhe të tillë është në kundërshtim me nenit 34 pika 1.11), e LZP-së, me të cilën përcaktohet: *“Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjërs si në vijim: ... l) përdorimi i gjuhës, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një akt të dhunës kundër personave tjerë ose pasurisë, ose e cila nxit apo mund të nxisë urrejtje kundrejt të tjerëve ose duke publikuar ose përdorur fotografi, simbole ose çfarëdo materiali tjetër që ka ose mund të ketë ndikim të tillë”*.

Neni 120 paragrafi 1 nën paragrafi 1.3 të LZP-së thekson se në rast se PZAP përcakton se ka ndodhur shkelje e të këtij ligji ose e rregullave të KQZ-së, mundet të vendosë një gjobë ndaj një subjekti politik, në vlerë deri në pesëdhjetëmijë (50,000.00) Euro.

Përveç kësaj një veprim i tillë sanksionohet edhe me nenin 24 paragrafi 9 nën paragrafi 9.1 Rregullës Nr.01/2024, ku përcaktohet se *“subjekti politik që është përfitues i fondeve për financimin e subjekteve politike përmes Buxhetit të Republikës së Kosovës dënohet me gjobë deri në pesë dhjetëmijë (50,000.00)euro”*.

Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit.

Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se veprimi që përben përsëritje të shkeljes për nga natyra është i njëjtë apo ngjashëm, subjektit politik që ka bërë shkelje të legjislacionit zgjedhor, apo ka bërë shkelje të legjislacionit edhe në proceset e mëparshme zgjedhore, që konsiston në faktin se subjekti politik LDK, ka qenë i njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me rregullat zgjedhore.

Paneli me rastin e shqiptimit të gjobës ka pasur parasysh edhe praktikën e mëhershme për rastet për afërsisht të ngjashme.

Përveç të cekurave më lartë Paneli, me rastin e vendosjes i vlerësoi edhe të gjitha pretendimet e subjektit politik Lidhja Demokratike e Kosovës, në kuadër të pretendimeve të theksuara në përgjigje në ankesë, mirëpo të njëjtët ishin të pabazuara, të pa qëndrueshme dhe pa bazë ligjore si në dispozitat e Ligjit për Zgjedhje, dhe si të tilla nuk ishin me ndikim për një vendim ndryshe, për çka Paneli, vlerësoi dhe vendosi si në dispozitiv të këtij vendimi.

Nga arsyet e theksuara me lart, e në kuptim të nenit 34 paragrafi 1 nënparagrafi 1.11, nenit 118 paragrafi 1, neni 120 paragraf 1 nënparagrafi 1.3, të LZP-së, nenit 10 paragrafi 1, nënparagrafi 1.2 të Rregullores Nr.01/2024 për Procedurat e Parashtrimit dhe Vendosjes së Ankesave vendosi si në dispozitiv të këtij vendimi.

Paneli Zgjedhor për Ankesa dhe Parashtrësa

Anr. 28/2025 më datë 15.01.2025

Kryesues i Panelit

Kujtim Pašuli



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi.